



CLAUSTRA GLION Aunc nuot concret

en vesta

(fmr/abc) Sigl uost 2024, en rodund treis onns, vegn il Center da formaziun Surselva a bardigliar. La scola mercantila Surselva a Glion e sias diversas partiziuns vegnan a dislocar dalla spunda da Quindas giu el marcau el baghetg niev dalla staziun. Ton ei fixau e decidiu. La Regiun Surselva sco purtadra dall'instituziun ha fixau culla Viafier retica in precontract e quei han omisduas partidas era comunicau alla publicitad il december 2020. Silla stad 2024 vegn ei cun quei a dar ina roschada ellas localitads che s'audan tiel complex dalla claustra dallas soras dominicanas da Glion. L'antieriura scola ed internat s. Giusep han las soras menau e purtau sezzas tochen la fin dils onns otgonta. Lu han ins fundau la Scola mercantila Surselva e purschiu e sviluppu divers formaziuns pils giuvenils dalla regiun. Aschia san quels absolver la matura professiunala alla scola mercantila, la scola propedeutica sco era il die-schavel onn alla Scola Vinavon.

Sigl areal dalla claustra vegnan cun quei numerusas stanzas da scola e localitads annexas libras. Sigl atun 2024 vul la cuminonza dallas soras dominicanas da Glion metter a disposiziun quei spazi per auters intents. Tgei che duei schabegiar cull'immobiglia ei aunc buca clar ed era buca discutau. Quei ha la priura dalla claustra, sora *Annemarie Müller*, confirmau alla FMR. Ella gi: «Nus havevan previu da s'entupar culla presidenta communal da Ilanz/Glion e cul sviluppu regiunal dalla Regiun Surselva. La pandemia ha denton paralisau la cuminonza dalla claustra ed ina emprema discussiun en caussa ei buca stada pusseivla». El cussegl general hagien ins bein fatg ponderaziuns tgei che dueigi schabegiar cullas localitads dalla scola che sesvidan. Ils proxims meins quentien ins da saver

s'entupar definitivamein per discutir las ideas.



Tgei capeta cun las localitads dalla scola mercantila Surselva?

MAD